



Sud Bosne i Hercegovine
Суд Босне и Херцеговине

Broj: S1 3 Iž 042770 22 Iž
Sarajevo, 28.04.2022. godine

Sud Bosne i Hercegovine u Sarajevu, u apelacionom vijeću sastavljenom od sudija Srete Crnjak, predsjednika vijeća, Dinke Bešlagić-Čovrk i Vesne Trifunović, članova vijeća, odlučujući o žalbi Dragice Bajat iz B., ul. ..., izjavljenoj protiv rješenja Centralne izborne komisije Bosne i Hercegovine, broj: 06-1-07-1-714/22 od 14.04.2022. godine, o davanju saglasnosti na Odluku Skupštine opštine Bileća o imenovanje članova Opštinske izborne komisije Bileća, u nejavnoj sjednici, održanoj dana 28.04.2022. godine, donio je

R J E Š E N J E

Žalba se odbacuje kao nedopuštena.

O b r a z l o ž e n j e

Rješenjem Centralne izborne komisije Bosne i Hercegovine, broj i datum navedeni u uvodu, data je saglasnost na Odluku Skupštine opštine Bileća, broj: 11.01/013-75/22 od 28.03.2022. godine, kojom se na dužnost u članstvu Opštinske izborne komisije Bileća, imenuju: 1. Radmila Koprivica, članica, 2. Dragan Delić, član, 3. Jelena Kapor, članica.

Protiv ove odluke žalbu je blagovremeno izjavila Dragica Bajat. U žalbi navodi da je Skupština opštine Bileća na svojoj IX redovnoj sjednici usvojila Odluku o objavljivanju Javnog oglasa za imenovanje članova Opštinske izborne komisije Bileća, ali da nije raspisala javni oglas jer to nije bila tačka dnevnog reda i o istoj se nije raspravljalo. Nadalje navodi da je Skupština opštine Bileća na X redovnoj sjednici donijela Odluku o imenovanju članova Opštinske izborne komisije Bileća.

Stoga predlaže da se žalba uvaži i ožalbeno rješenje ukine, kako bi se predmetni Javni oglas našao na sjednici SO-e Bileća, o kome će odbornici odlučivati.

U odgovoru na žalbu Centralna izborna komisija je predložila da se žalba odbaci kao nedopuštena jer je izjavljena od neovlaštenog lica, ili u protivnom odbije kao neosnovana.

Pošto je ispitalo osporenu odluku u granicama žalbenih razloga, vijeće Apelacionog odjeljenja Suda Bosne i Hercegovine je odlučilo kao u izreci iz sljedećih razloga:

Žalba nije dopuštena.

Iz stanja spisa predmeta proizilazi da je donosilac ožalbene odluke, Centralna izborna komisija Bosne i Hercegovine, dala saglasnost na Odluku Skupštine opštine Bileća, broj: 11.01/013-75/22 od 28.03.2022. godine, kojom se na dužnost u članstvu Opštinske izborne komisije Bileća, imenuju: 1. Radmila Koprivica, članica, 2. Dragan Delić, član i 3. Jelena Kapor, članica.

Odredba člana 41. Zakona o upravnom postupku BiH (Službeni glasnik BiH 29/02, 12/04, 88/07, 93/07, 41/13 i 53/16) definiše pojam stranke kao osobe po čijem je zahtjevu pokrenut postupak ili protiv koje se vodi postupak ili koja radi zaštite svojih prava ili pravnih interesa ima pravo učestvovati u postupku. Navedeni zakon u odredbi člana 213. stav 1. propisuje da stranka ima pravo žalbe protiv rješenja donesenih u prvom stepenu, dok odredba člana 214. stav 1. tog zakona propisuje da se pravo žalbe protiv rješenja organa uprava BiH i institucija koje imaju javna ovlaštenja, uređuje zakonom BiH iz odgovarajuće upravne oblasti iz nadležnosti institucija BiH. Stoga je odredbom člana 6.2 stav 1. Izbornog zakona BiH („Službeni glasnik BiH“, br. 23/01, 7/02, 9/02, 20/02, 25/02, 4/04, 20/04, 25/04, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20) utvrđeno pravo birača i političkog subjekta da izornoj komisiji može podnijeti prigovor ukoliko je njegovo pravo, utvrđeno Izbornim zakonom BiH, povrijeđeno.

U predmetnoj stvari, žalbu je podnijela Dragica Bajat, koja nije bila stranka u postupku, jer se kao stranka mogu pojaviti lica koja su učestvovala u konkursnoj proceduri odnosno ona lica koja su se prijavila po javnom oglasu za izbor članovi Opštinske izborne komisije Bileća, a nisu imenovana od strane Skupštine opštine Bileća, ako je smatrala da su joj povrijeđena prava u skladu sa Izbornim zakonom BiH.

Podnosilac žalbe nije ovlašten za podnošenje žalbe jer nije bila stranka u postupku izbora članova Opštinske izborne komisije Bileća. Stoga, po shvatanju ovog vijeća, donošenjem pobijane odluke nisu povrijeđena prava podnosioca žalbe, posebno imajući u vidu odredbe člana 2.12 stav 5. Izbornog zakona BiH kojim je propisano da članove Opštinske izborne komisije imenuje Skupština opštine Bileća uz saglasnost Centralne izborne komisije BiH posebnim propisom.

Kako je žalba podnesena od lica koje nije ovlašteno za podnošenje žalbe, to je apelaciono vijeće primjenom odredbe člana 180. stav 1. i 3. Zakona o parničnom postupku pred Sudom BiH („Službeni glasnik BiH“, broj: 36/04, 84/07 i 58/13), a koja odredba se primjenjuje na osnovu člana 60. a) Zakona o upravnim sporovima Bosne i Hercegovine („Službeni glasnik BiH“, br. 19/02, do 74/10), odbacilo kao nedopuštenu.

**PREDSJEDNIK VIJEĆA
S U D I J A**

Sreto Crnjak

2